



05. marts 2012

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

1. **Naalakkersuisut eqqarsaatigisinnaavaat nioqqutissanut 50.000 koruunit sinnerlugit nalilinnut akitsuusersuisarnermi malittarisassat allangortinnissaat, taamaasilluni akitsuummik akiliiffissaq pisalersillugu ullormi nioqqutissap tunineqarfiani?**
2. **Apeqquq taaneqartut malittarisassat allangortinneqassappat iluaqutissat ajoqutissatullu suut Naalakkersuisut isigaat?**

(Inatsisartuni ilaasorta Justus Hansen, Demokraatit)

Tunngavilersuut:

Nioqqutissanik akitsuusersukkanik tuniniaasartut soorunami isumagisussaavaat nioqqutissamut akitsuutip Landskarsimut akilertarnissaa malittarisassat atuuttut naapertorlugit. Ullumikkut imaappoq, tuniniaasartoq akitsuummik Landskarsimut akiliisarlugi, nioqqutissaq nunamut maanga pissunneqaraangat. Amerlanerpaatigut tamanna naapertuuppoq, taamaaliornikkummi qulakkeerneqarpoq Landskarsimut tuttussat akilerneqartarneri.

Ilaatigullu malittarisassat naapertuuppallaarneq ajorpoq, tuniniaasartut akisuunik pisinerminni, soorlu biiliniq, qamuterallannik il.il. toqqorsivimmiittuuteqalersinnaasarmata akitsuutilinnik, akilerneqartussanillu nioqqutissat sulii tunineqartinnagit. Taama pisoqartillugu tuniniaasartup akiliisinnaassusia innarlerneqarsinnaasarpoq, aningaasat isertereerneqarneq ajormata, akiitsuutit akilerneqarfissaata nalaani. Eqqartoratsigillu nioqqutissat 50.000 koruuninik akillit akisunerusulluunniit, taava aningaasarpasuit pineqalersinnaasarput.

Tamanna tunngavigalugu soqutigintut isigaara misissorneqarsinnaappat akitsuutit akilerneqarfissaat allangortinneqarsinnaanersoq, eqqartorneqartilugit – nioqqutissat nioqqutigeqqitassat – 50.000 koruuninik amerlanerusulluunniit nalillit. Isumaqarpunga tuniniaasartup akiliisinnaassusaat pitsanngortinneqassasoq kiisalu akitsuummik akiliisussaataitanerup allangortinnera taakku atungaannik pitsanngorsaassasoq.

Nalunngilara tamatsinnut pingaartoq, inuiaqatigiit pissarsitinneqartarnissaat akitsuutinik akiliisitsinikkut. Taamaattumik aamma isumaqarpunga, akitsuutinik akiliisarnermut malittarisassat allangortinneqassappata, Namminersorlutik Oqartussat/Landskarsi arlaatigut qularnaveeqqusiiffiqeqartariaqassasoq, qulakkeerumallugu nioqqutissap tunineqarnerani akitsuutip Landskarsimut akilerneqartarnissaa.



DEMOKRAATIT
DEMOKRATERNE

Apeqqutima piffissaritaasut ullut sulliviit naliginnaasut qulit ingerlanerani akineqarnissaannut qilanaarpunga.